

NEZAVISNI STRUKOVNI SINDIKAT RADNIKA ZAPOSLENIH U ZDRAVSTVU U FBiH

U vezi sa aktuelnim, vrlo ozbiljnim napadima na važeće radno zakonodavstvo i stečena prava radnika, s krajnim ciljem donošenja novog Zakona o radu isključivo po mjeri poslodavaca, međunarodnih finansijskih i drugih institucija koje su u službi interesa kapitala, Nezavisni strukovni sindikat radnika zaposlenih u zdravstvu u FBiH usvaja

PROGLAS

1. ZAKON O RADU JE RADNIČKI USTAV i ne može biti donesen bez saglasnosti radnika i sindikata.
2. Zakon o radu nije samo Zakon o radu, on je mnogo više od toga! Radni odnos, kao najvažniji institut Zakona o radu, nije samo obični ugovorni odnos između poslodavca i radnika. Radni odnos je društveni odnos i kvalitet radnog odnosa kroz materijalno obeštećenje za uloženi umni ili fizički rad radnika, odnosno plaću, koji određuje našu egzistenciju i egzistenciju naših porodica, našeg društva i naše države. Radna mjesta, kvalitetan radni odnos i adekvatno plaćen rad određuju standard naše zajednice, našeg društva i naše države.
3. Lažu svi oni koji kažu da je važeći Zakon o radu prepreka za poslovanje, investiranje, otvaranje novih radnih mjesta i nova zapošljavanja. Zaboravljaju da su glavne prepreke u pravnoj, ekonomskoj i socijalnoj nesigurnosti koju proizvode oni koji u naše ime vladaju, oni koji se ponašaju kao gospodari života i smrti. Glavna prepreka za razvoj i zapošljavanje je naša neodgovorna, nesposobna i korumpirana vlast koja u kontinuitetu proizvodi nestabilan politički i ekonomski ambijent. To je naša vlast koja je kroz kriminalnu privatizaciju opljačkala i još pljačka naše fabrike i predaje ih u ruke profiterima, bliskim političkim i rođačkim tajkunima, vlast koja je ukinula na stotine hiljada radnih mjesta istjerujući radnike iz fabrika na ulice. Ista ta vlast godinama privileguje svoje moćnike, štiti ih od zakona svojim utjecajem na pravosudnu vlast i tužilaštva, poreske uprave i inspeksijske organe i dozvolja im da ne plaćaju poreze i doprinose. Ista ta vlast, štiteći svoje profitere i kriminalce stvara neloyalnu konkurenciju i ubija sve poštene privrednike i poduzetnike koji hoće da rade po zakonu, namećući im prevelike obaveze po različitim osnovama, koje nisu u stanju izvršavati i koji kao takvi budu zbrisani iz privrednog života zemlje. To je naša vlast, to su naši vlastodršci koji nas ne smatraju svojim.
4. Obmanjuju javnost svi oni koji kažu da su prepreka za nova zapošljavanja Kolektivni ugovori, svi oni koji kažu da su Kolektivnim ugovorima radnici previše zaštićeni - zaštićeni do te mjere da ih ne mogu nikako otpustiti. To je čista laž, jer nikada na ovim prostorima nije otpušten veći broj radnika nego što ih je otpušteno u posljednjih nekoliko godina. Obmanjuju javnost da je Kolektivnim ugovorima definisana prevelika cijena rada. I to je laž, jer je prema našim Kolektivnim ugovorima prosječna dnevnicu radnika manja od satnice radnika u Njemačkoj, Italiji ili Austriji.
5. ŠTA JE NJIHOV CILJ? Njihov cilj je da izmjenama Zakona o radu i ukidanjem Kolektivnih ugovora ukinu pravne norme koje štite radnike. Prosto rečeno, oni hoće da razoružaju radničku klasu i da je ostave potpuno obespravljenu. Oni hoće da novim Zakonom o radu ukinu radni odnos na neodređeno vrijeme, preferirajući radni odnos na određeno vrijeme. Jednostavnije i jasnije rečeno - oni hoće radni odnos pretvoriti u robovlasnički odnos. Takvu namjeru planiraju realizirati uvođenem u Zakon tzv. „Agencija za iznajmljivanje radnika”. Oni hoće sve slobode na uštrb sloboda i prava radnika, da

primaju kad hoće i koga hoće, a da otpuštaju radnike po svom nahođenju bez bilo kakvih obaveza prema njima. Oni zbog toga hoće Zakon o radu po svojoj mjeri i ukidanje Kolektivnih ugovora. Oni više ne pišu i ne govore jezikom razumnim za svakog radnika i građanina. Tako oni hoće, kako kažu, za naše bolje sutra, na putu prema Evropskoj uniji, uvesti fleksibilizaciju tržišta rada, na praznom prostoru, koje zapravo kod nas i ne postoji.

Obzirom da smo mi radnička organizacija, potrudili smo se da našim radnicima, našim članovima sindikata i javnosti prevedemo na razuman jezik taj njihov termin fleksibilizacije i odštampali letak koji ste imali priliku pročitati. Želimo da taj letak bude dostupan svakom članu našeg sindikata, a iste ćemo u slučaju potrebe na ulicama naših gradova podijeliti i svim građanima.

6. Oni naravno imaju i svoju strategiju na putu do neljudskog i prljavog cilja - novcem iz naših džepova. Političari rasipaju naše pare iz Budžeta i stvaraju svoja lična bogatstva. Ovi drugi, njihovi bliski prijatelji, profiteri koji su opljačkali i prisvojili naše fabrike također su stekli ogromna bogatstva. Oni imaju moć u prljavo stečenom novcu. Oni našim novcem plaćaju razne samozvane i nadobudne ekonomske analitičare i eksperte, Hurtiće i Murtiće, da javno istupaju u njihovu korist i razvlače pamet svima nama papagajskim pričama da su za teško ekonomsko-socijalno stanje našeg društva krivi radnici, Kolektivni ugovori i na kraju njihove interesne organizacije tj. sindikati. Oni hoće da nas posvađaju između različitih sindikata, a idu i do te mjere da posvađaju roditelje i djecu na način da proturaju priču kako se mladi ne mogu zaposliti zato što njihovi roditelji imaju radni odnos na neodređeno vrijeme. Oni hoće da posvađaju naše članove sindikata sa njihovim sindikalnim rukovodstvima.
7. Šta mi hoćemo? IMAMO LI MI NAŠU STRATEGIJU? DA, IMAMO! Nezavisni strukovni sindikat radnika zaposlenih u zdravstvu u FBiH ima svoju strategiju! Mi nemamo novac, ali imamo najveću moć. Naša najveća moć su radnici, naši članovi. Naša moć je masa udruženih radnika. Mi se mobilišemo za odbranu naših prava, prava koja nam niko nije dao i prava za koja su se borili naši prethodnici. Mi se mobilišemo i za odbranu prava naše djece i budućih pokoljenja. I današnji skup je mobilizacija.
8. U skladu sa našom strategijom donijeli smo sljedeće odluke:
 - Imenovali smo komisiju eksperata iz oblasti radnog prava;
 - Imenovali smo pregovarački tim i definisali minimum ispod koga nećemo dati našu saglasnost na njihov Zakon o radu;
 - Donijeli smo odluku o referendumu. Niko iz Saveza sindikata BiH nema pravo i neće potpisati nikakav pristanak na Zakon o radu sve dok referendumom, na kojem će se izjašnjavati svi članovi sindikata pojedinačno, ne budemo dobili neophodnu većinu glasova;
 - Mi imamo i strategiju za slučaj da pokušaju da nas prevare, kao što to obično i rade: Ukoliko samovoljno, bez saglasnosti sindikata, upute u parlamentarnu proceduru prijedlog Zakona o radu na usvajanje, mi blokiramo Federalni parlament i organizujemo proteste i štrajkove.

Za uspjeh naših akcija moramo biti budni i spremni. Pozivamo vas, drage kolegice i kolege, danas prisutni na ovoj proširenoj sjednici, i sve druge naše članove koje ćete vi pozvati, da budemo budni i spremni da na poziv Nezavisnog strukovnog sindikata radnika zaposlenih u zdravstvu u FBiH u slučaju potrebe u najkraćem mogućem vremenu budemo pred Parlamentom i da spriječimo donošenje Zakona o radu koji neće biti po mjeri radnika.